



# COMUNE DE MARA

## Provìntzia de Tàtari

### DELIBERATZIONE DE SU CONSÌGIU COMUNALE N. 30 DE SU 27/06/2022

**OGETU:** APROVATZIONE PROPOSTA DE UNA PRIMA ISTÈRRIDA DE PROGRAMMA CUMPARTZIDU DE INTERBENTOS PRO SOS COMUNES CHI SUNT MINIMENDE DE POPULATZIONE.

S'annu duamìgia e bintiduos, sa die bintisete de su mese de Làmpadas a sas 18:30, pustis de un'avisu de cunvocatzione regolare, s'est reunidu in modalidade ammesturada, cun calicunu in presèntzia e àteros in video cunferèntzia, su Consìgiu Comunale, de su cale a s'apellu resurtant:

SAMBENADU E NÙMENE	PRESENTE
CHESSA PAOLO	EMMO
FIORI ANTONIO	EMMO
SALARIS RICCARDO	EMMO
PIU CHRISTIAN	EMMO
MONNI CRISTINA	EMMO
NUGHES PIETRO	--
TOLA BASTIANO	EMMO
NUGHES MARCELLO	--
MARIANI ANTONIO	--
MANAI VITTORIO	EMMO

Presentes n° 7 Ausentes n° 3

Partètzpat su Segretàriu Comunale FALCHI ANTONIO MARIA, chi providit a redatzionare custu verbale.

Leat sa Presidèntzia su Presidente CHESSA PAOLO, chi, reconnota legale s'adunàntzia, decrarat aberta sa setziada.

## SU PRESIDENTE

Introduit s'argumentu insertadu a su puntu n. 6 de s'ordine de sa die " **ADOTZIONE DE UNU RECOVERY PLAN-OBIEATIVU 1 CONTRA A SA MINIMADURA DE SA POPULATZIONE**" e acrarat sa proposta de deliberatzione

## SU CONSÌGIU COMUNALE

**INTESU** s'interbentu de su Presidente chi diventat in cuncretu comente a s'ghire;

Sa Sardigna est interessada dae sa minimadura drammatica de populatzione in sos giassos internos e est bidende una fuida de sa gente cara a sos giassos de sa costa, a sos de sas tzitades sardas e a s'emigratzione.

No ant àpidu perunu resurtu sos apellos e sas protestas de sos amministradores, políticos e intelletuales, pro s'arriscu demogràficu chi minetzat sa nazione nostra. Sa minimadura de sa gente at difatis cunsighèntzas graes meda subra de s'economia, de sa cultura e de s'identidade matessi de sos sardos.

E puru custu fenòmenu est sinnaladu dae tempus meda, tropu tempus. Chie istùdiat sa "demografia" e sos urbanistas, ispetzialistas de sa matèria sos istùdios de sos cales pagas bortas sunt tentos in giustu e puntuale cunsideru, lu sutalineant giai dae sos annos 60 de su sèculu coladu.

Ammentamus sa martza nòdida de Micheli Columbu, Sìndigu de Ollolai, chi in su 1964 fiat tzucadu dae su bidditzolu suo cara a Tàtari e cara a Casteddu pro sensibilizare sos tzentros de su poderiu e mòvere sa cussèntzia de totus.

Tentativu inùtile ca a pustis de sessanta annos sa minimadura est prus grae de in antis, interessat totu sos Comunes de s'internu e nche tràgiat tota sa Sardigna cara a un'impoberimentu generale. Agiudare sa parte de s'Ìsula chi est patende de prus cheret nàrrere interbènnere pro la sarvare tota.

In custos ùrtimos annos si dat prus atenzione a custu problema ma sena unu resurtu legislativu o finantziàriu cuncretu. Tropu debiles sos sustennos pro gherrare contra a sa minimadura de sas nàschidas o favorèssere sa torrada. Sos vantàgios de s'economia e de sos servitzios in favore de sos tzentros a in ue tzucat sa gente sunt fortes de a beru.

Mudare s'andanta netzèssitat de programmas de acumprire in tempus curtzu, mesanu e longu. No est de badas ammentare su Pianu Marshall, su nùmene berdaderu de su cale fiat, non sena motivu, **European Recovery Program**; comente est giustu puru sutalineare chi pro fàghere fronte a s'emergèntzia cajonada dae sa *pandemia Covid-19*, s'Unione Europea at impitadu un'àteru traste finantziàriu istraordinàriu, su **Recovery Fund**.

Sa minimadura de sa populatzione de sa Sardigna cheret afrontada cun unu pianu istraordinàriu. Non bi podent èssere alternativas sèrias e cuncretas a unu **Recovery Plan** pro sos giassos Internos; comente non si podent prus atzetare àteros ritardos in s'adotzione de programmas de cuntrastu e de propassada de su problema connotu bene. Su programma est giai marcadu pro bona parte dae su Cuadru Comunitàriu de Sustennu cun s'Obietivu 1, ca "cuntenet sa fotografia de sa situatzione de partèntzia, s'istratègia, sa prioridade de atzione, sos obietivos ispetzificos, sa partzidura de sas resursas finantziàrias, sas cunditziones de acumprida".

Sas regiones europeas de s'obietivu 1 sunt cussas in ritardu de isvilupu, est a nàrrere cun unu produktu internu lordu pro-onniunu prus pagu de su 75% de sa mèdia comunitària. Finalidades de su QCS est cussu de coordinare sos interbentos e de los fàghere prus eficatzes respetu a sa minimadura de su ritardu econòmicu-sotziale de sas àreas sebestadas in base a cantu evidentziadu

dae su **pianu de isvilupu**. Obietivu generale de su QCS est : • *segudare intro de su perìodu de acumprida de su QCS a manera istàbile unu caminu de crèschida de sas regiones superiore a cussu de s'Unione europea* • *minimare su discumbèniu sotziale*

Sas mesuras de interbentu prevididas dae su QCS sunt finantziadas dae sos fundos istruturales comunitarios (FESR, FSE, FEAOG, SFOP) e puru dae fundos istatales e regionales, pùblicos e privados.

Cunforma a su critèriu rèditu-Pil sa Sardigna at beneficiadu de resursas finantziarias de importu a comintzare dae su 1994. Nointames s'impitu issoro no at permitidu de segudare su resurtadu prevididu, est a nàrrere de barigare su “gap” cun sas regiones prus isvilupadas. **A livellu regionale est puru crèschida sa diferèntzia tra sos giassos internos disamparados e cussos urbanos e de sas costas: non si podet evitare cando si retzit pro “rèditu” ( s'indicadore chi pro totu sos Sardos prèmiat de prus) e si torrat a partzire pro “abitante”, est a nàrrere s'indicadore prus punitivu pro sos Comunes chi sunt minimende de popolazione e arriscu de iscumparta.**

Leadu a cunsideru totu custu paret urgente e chi non si podet transire s'adotzione de unu programma de interbentu ispetzificu chi, abarrende firmos àteros trastes comente sa fiscalidade de vantàgiu, sos prèmios pro servìtzios e professiones esertzitados in sos territòrios, e àteras iniziativaes coerentes, apat **su critèriu de rèditu e PIL** de sos tzitadinos sardos comente elementu chi los diferèntziat pro s'assegnatzione de finantziamentos in tempus a curtzu o mesanu.

Cun sos fundos de su QCS sa Sardigna retzit sa solidariedade de sas regiones prus isvilupadas. Sa Regione devet mustrare àtera e tanta solidariedade dende cussos finantziamentos, tzertos in s'entidade e in su tempus, a sos Comunes isvantagiados, chi sunt puru sos Comunes chi ant rèditu prus bàsciu e minimadura de sa popolazione prus manna.

A manera coerente a su limite de su 75% adotadu dae sos Istados membros de s'Unione Europea pro sustènnere sas regiones cun rèditu inferiore, sa Regione Sardigna devet destinare sas resursas gasi retzidas solu a sos Comunes chi ant rèditu-PIL pro-onniunu inferiore a su 75% de sa mèdia regionale.

**SU CONSÌGIU COMUNALE DE MARA**, appellende-si a Istituzione, Entes, ANCI, Organizzazione datoriales e sindacales, a sa Crèsia e a totu su Pòpulu Sardu,

**CUNSIDERADU CHI** subra de custa deliberatzione non sunt achisidos sos parres de sos cales a s'art. 49 de su Decretu Legislativo n° 267/2000 ca si tratat de un'atu solu de indiritzu polìticu;

**TOTU** custu premitidu e cunsideradu;

**ACABBADA** sa discussione su Sindigu faghet votare su puntu in s'òrdine de sos traballos;

**CUN** votazione a favore totu de acordu espressada cunforma a sa lege:

## **DELÌBERAT**

**DE PEDIRE** a sa Regione Autònoma unu *Recovery Plan* ispetzificu in gradu de minimare su ritardu sòtziu-econòmicu de sos Comunes sardos, sebestados cun su matessi critèriu adotadu dae s'Unione Europea cun su QCS, e pònnere fine a sa desertificatzione produttiva e culturale de àreas mannas de sa Sardigna;

**CHI** a comintzare dae sa programmatzione 2021-2027 siat postu a un'ala s'indicadore de su finantziamentu “pro abitante”, chi punitivu pro sos tzentros chi sunt minimende de popolazione, e impitadu cussu de su rèditu in coerèntzia cun su sèberu de s'Unione Europea;

**CHI** puru pro sos fundos de su Pnrr, chi comente programmatzione betzas comente PIA, Patos Territoriales, Acordos de Programma, etz., parint indiritzados cara a sa “ciambella”

**demogràfica, siant prevididas resursas tzertas pro minimare su discumbèniu de s'istampa sòtziu-econòmica in mesu de sa “ciambella” Sarda.**

Cun àtera votazione totu de acordu, espressada cunforma a sa lege, delibera de fàghere custa deliberazione luego esecutàbile cunforma a s'art. 134, comma 4° de su D.Lgs. 267/2000 e mm.ii.ii.

---

### **PARRE DE REGULARIDADE TÈCNICA**

Su Responsàbile de su Servìtziu, cunforma a s'art. 147/bis de su TUEL 267/2000 e de s'art. 11 de su Regulamentu subra de sos controllos internos, in òrdine a sa proposta n.ru 489 de su 27/07/2021 espressat parre a **FAVORE**.

Parre firmadu a manera digitale dae su Responsàbile de su Servìtziu CHESSA PAOLO oe su 30/07/2021.

---

### **PARRE DE REGULARIDADE CONTÀBILE**

Su Responsàbile de su Servìtziu, cunforma a su D.Lgs. 267/2000 art. 151 c. 4, in òrdine a sa regularidadecontàbile de sa Proposta n.ru 489 de su 27/07/2021 espressat parre a **FAVORE**.

Parre firmadu a manera digitale dae su Responsàbile de su Servìtziu CHESSA PAOLO oe 30/07/2021.

---

### **LÈGHIDU APROVADU E SUTASCRTU**

Su Presidente  
CHESSA PAOLO

Su Segretàriu Comunale  
FALCHI ANTONIO MARIA

---

### **NOTA DE PUBLICATZIONE N. 457**

Su 30/06/2022 est publicada in s'Albu Pretòriu sa Delibera de Consìgiu n.ru 30 de su 27/06/2022 cun ogetu: **APROVAZIONE PROPOSTA DE UNA PRIMA ISTÈRRIDA DE PROGRAMMA CUMPARTZIDU DE INTERBENTOS PRO SOS COMUNES CHI SUNT MINIMENDE DE POPULATZIONE.**

At a abarrare afissada pro 15 dies cunforma a s'art. 124 de su T.U. 267/2000.

**Esecutiva cunforma a sas dispositziones de lege in vigèntzia.**

Nota de publicatzione firmada dae BUIONI ANGELA su 30/06/2022.

Còpia digitale de documentu informàticu firmadu e produidu cunforma a su Dlgs 82/2005 e normas respetivas cullegadas